

四庫全書

子部

欽定四庫全書

經濟類編卷二十六

明 馮琦馮瑗 撰

諫諍類一

諫臣 二十則

孔子曰良藥苦於口利於病忠言逆於耳利於行故武王諤諤而昌紂嘿嘿而亡君無諤諤之臣父無諤諤之子兄無諤諤之弟夫無諤諤之妻士無諤諤之友其亡

可立而待故曰君失之臣得之父失之子得之兄失之弟得之夫失之妻得之士失之友得之故無亡國破家悖父亂子放兄棄弟狂夫淫婦絕交敗友

魯哀公問於孔子曰子從父命孝乎臣從君命貞乎三問孔子不對孔子趨出以語子貢曰鄉者君問丘曰子從父命孝乎臣從君命貞乎三問而丘不對賜以為何如子貢曰子從父命孝矣臣從君命貞矣奚疑焉孔子曰小人哉賜不識也昔者明王萬乘之國有爭臣七人

則主無過舉千乘之國有爭臣五人則社稷不危百乘之家有爭臣三人則祿位不替父有爭子不陷無禮士有爭友不行不義故子從父命奚詎為孝臣從君命奚詎為貞夫能審其所從之謂孝之謂貞矣

劉向正諫篇 易曰王臣蹇蹇匪躬之故人臣所以蹇蹇為難而諫其君者非為身也將欲匡君之過矯君之失也君有過失者危亡之萌也見君之過失而不諫是輕君之危亡也夫輕君之危亡者忠臣不忍為也三諫

而不用則去不去則身亡身亡者仁人所不為也是故
諫有五一日正諫二曰降諫三曰忠諫四曰戇諫五曰
諷諫孔子曰吾其從諷諫矣乎夫不諫則危君固諫則危
身與其危君寧危身危身而終不用則諫亦無功矣智
者度君權時調其緩急而處其宜上不敢危君下不以
危身故在國而國不危在身而身不殆昔陳靈公不聽
泄冶之諫而殺之曹羈三諫曹君不聽而去春秋序義
雖俱賢而曹羈合禮

臣術篇 從命利君為之順從命病君為之諛逆命利君謂之忠逆命病君謂之亂君有過不諫諍將危國殞社稷也有能盡言於君用則留之不用則去之謂之諫用則可生不用則死謂之諍有能比和同力率羣下相與彊矯君君雖不安不能不聽遂解國之大患除國之大害成於尊君安國謂之輔有能亢君之命反君之事竊君之重以安國之危除主之辱攻伐足以成國之大利謂之弼故諫諍輔弼之人社稷之臣也明君之所尊

禮而闇君以為已賊故明君之所賞闇君之所殺也明君好問闇君好獨明君上賢使能而享其功闇君畏賢始能而滅其業罰其忠而賞其賊夫是之謂至闇桀紂之所以亡也詩云曾是莫聽大命以傾此之謂也

漢宣帝選博士諫大夫通政事者補郡國守相以蕭望之為平原太守望之雅意在朝遠為郡守內不自得乃上疏 陛下哀憫百姓恐德化之不究悉出諫官以補郡吏所謂憂其末而忘其本者也朝無爭臣則不知過

國無達士則不聞善願陛下選明經術溫故知新通於
機微謀慮之士以為內臣與叅政事諸侯聞之則知國
家納諫憂政亡有闕遺若此不怠成康之道其庶幾乎
外郡不治豈足憂哉

范曄鍾寒傳論 左丘明有言仁人之言其利溥哉晏
子一言齊侯省刑若鍾離意之就格請過寒朗之廷爭
寃獄篤矣乎仁者之情也夫正直本於忠誠則不詭本
於諫爭則絞切彼二子之所本得乎天故言信而志行

也

唐太宗時魏徵有疾上手詔問之且言不見數日朕過多矣若有聞見可封狀進來徵上言比者弟子陵師奴婢忽主下多輕上漸不可長又言陛下臨朝常以至公為言退而行之未免私僻或畏人知橫加威怒欲蓋彌彰竟有何益徵宅無堂上命輟小殿之材以構之五日而成仍賜以素屏褥几杖等以遂其所尚徵上表謝上手詔曰處卿至此蓋為黎元與國家何事過謝

元稹上疏論諫職 昔太宗以王珪魏徵為諫官宴遊
寢食未嘗不在左右又命三品以上入議大政必遣諫
官一人隨之以參得失故天下大理今之諫官大不得
豫召見次不得參時政排行就列朝謁而已近年以來
正牙不奏事庶官罷巡對諫官能舉職者獨誥命有不
便則上封事耳君臣之際諷諭於未形箚畫於至密尚
不能回至尊之盛意況於既行之誥令已命之除授而
欲以咫尺之書收絲綸之詔誠亦難矣願陛下時於延

英召對使盡所懷豈可寘於其位而屏棄踈賤之哉頃
之復上疏以為理亂之始必有萌象開直言廣視聽理
之萌也甘諂諛蔽近習亂之象也自古人主即位之初
必有敢言之士人主苟受而賞之則君子樂行其道競
為忠讜小人亦貪得其利不為回邪矣如是則上下之志
通幽遠之情達欲無理得乎苟拒而罪之則君子卷懷
括囊以保其身小人阿意迎合以竊其位矣如是則十
步之事皆可欺也欲無亂得乎昔太宗初即政孫伏伽

以小事諫太宗喜厚賞之故當是時言事者惟患不深切未嘗以觸忌諱為憂也太宗豈好逆意而惡從欲哉誠以順適之快小而危亡之禍大故也陛下踐阼今已周歲未聞有受伏伽之賞者臣等備位諫列曠日彌年不得召見每就列位屏氣鞠躬不敢仰視又安暇議得失獻可否哉供奉官尚爾況踈遠之臣乎此蓋羣下因循之罪也因條奏請次對百官復正牙奏事禁非時貢獻等十事憲宗頗嘉納其言時召見之

玄宗時李林甫為相諫官言事皆先白宰相退則又以所言白之御史言事須大夫同署至是敕盡革其弊開諫諍之塗又令宰相分直政事筆承旨旬日而更懲林甫及楊國忠之專權故也

白居易初授拾遺上憲宗書 臣謹按六典左右拾遺掌供奉諷諫凡發令舉事有不利于時不合于道者小則上封大則廷諫其選甚重其秩甚卑所以然者抑有由也大凡人之情位高則惜其位身貴則愛其身惜位

則偷合而不言愛身則苟容而不諫此必然之理也故
拾遺之置所以卑其秩者使位未足惜身未足愛也所
以重其選者使上不忍負恩下不忍負心也夫位未足
惜恩不忍負然後能有闕必規有違必諫朝廷得失無
不察天下利病無不言此國朝置拾遺之本意也由是
而言豈小臣愚劣昧懦所宜居之哉

杜牧與人論諫書 某踈愚怠墮不識機括獨好讀書
讀之多矣每見君臣治亂之間興亡諫諍之道遐想其

人舐筆和墨則與人君一悟而至於治平不悟則烹身滅族唯此二者不思中道自秦漢已來凡千百輩不可悉數然怒諫而激亂生禍者累累皆是納諫而悔過行道者不能百一何者皆以辭語迂險指射醜惡致使然也夫迂險之言近於誕妄指射醜惡足以激怒夫以誕妄之說激怒之辭以卑凌尊以下干上是諫殺人者殺人愈多諫畋獵者畋獵愈甚諫治宮室者宮室愈崇諫任小人者小人愈寵觀其旨意且欲與諫者一鬪是

非一決怒氣耳不論其他是以每於本事之上尤增飾之今有兩人道未相信甲謂乙曰汝好食某物慎勿食果更食之必死乙必曰我食之久矣汝謂我死必倍食之甲若謂乙曰汝好食某物第一少食苟多食必生病乙必因而謝之減食何者迂險之言則欲反之循常之說則必信之此乃常人之情世多然也是以因諫而生亂者累累皆是也漢成帝欲御樓船過渭水御史大夫薛廣德諫曰宜從橋陛下不聽臣自刎以血汚車輪陛

下不得入廟矣上不說張猛曰臣聞主聖臣直乘船危就橋安聖主不乘危御史大夫言可聽上曰曉人不當如是邪乃從橋近者寶歷中敬宗皇帝欲幸驪山時諫者至多上意不決拾遺張權輿伏紫宸殿下叩頭諫曰昔周幽王幸驪山為犬戎所殺秦始皇葬驪山國亡玄宗皇帝宮驪山而祿山亂先皇帝幸驪山而享年不長帝曰驪山若此之凶邪我宜一往以驗彼言後數日自驪山迴語親倖曰叩頭者之言安足信哉漢文帝亦謂

張釋之曰卑之無甚高論令可行也今人平居無事友朋骨肉切磋規誨之間尚宜旁引曲釋疊疊繹繹使其樂去其不善而樂行其善況於君臣尊卑之間欲因激切之言而望道行事治者乎故禮稱五諫而直諫為下前數月見報上披閣下諫疏錫以幣帛僻左且遠莫知其故近於遊客處一睹閣下諫草明白辯婉出入有據吾君聖明宜為動心數日在手味之不足且抃且慰三者交并不能自止吾君聞諫既且行之仍復寵錫誘能

諫者斯乃堯舜禹湯文武之心也聞於遠地宜為吾君抃也閣下以忠孝文章立於朝廷勇於諫而且深於其道果能輔吾君而光世德某承閣下之厚愛異於異時資閣下之知以進尺寸能不為閣下之喜復自喜也吾君今日披一䟽而行之明日聞一言而用之賢才忠良之士森列朝廷是以奮起志慮各盡所懷則文祖武宗之業窮天地日出月入皆可掃洒以復厥初某縱不得效用但於一官一局筐篋簿書之間活妻子而老身命焉

作為歌詩稱道仁聖天子之所為治則為有餘能不自
慰故獲閣下之一疏抃喜慰三者交并真不虛也宜如
此也無因面讚其事書紙言誠不覺繁多

武宗時詔臣下言人罪惡並應請付御史臺按問毋得
乞留中以杜讒邪其後上復謂宰相曰文宗好聽外議
諫官言事多不著名有如匿名書李德裕曰臣頃在中
書文宗猶不爾此乃李訓鄭注教文宗以術御下遂成
此風人主但當推誠任人有欺罔者威以明刑孰敢哉

上善之

中書門下奏諫官缺員請補宣宗曰諫官要在舉職不必多人如張符牛叢趙璘輩數人使朕日聞所未聞足矣

宋真宗時田錫居諫署直言時政得失每指斥將相備位無所籌謀封疏凡五十二奏悉焚之曰直諫臣職也豈可藏副示後以賣直邪及卒帝謂李沆曰田錫直臣也朝廷少有闕失方在思慮錫之章疏已至矣嗟惜久

之

張詠個儻有大志尚氣節嘗曰事君者廉不言貧勤不言苦忠不言已效公不言已能斯可以事君矣故所至以政績聞真宗嘗稱其才堪將帥以疾不盡其用臨卒上疏言不當造宮觀竭天下之財傷生民之命此皆賊臣丁謂誑惑陛下乞斬謂頭置國門以謝天下然後斬詠頭置丁氏之門以謝謂帝歎其忠諡忠定

蔡襄論增置諫官 臣伏見朝廷選用王素余靖歐陽

脩等增備諫官是三人者皆特立之士昔以直言觸忤
權臣擯斥且久今者一日並命人無賢愚萬口相慶皆
謂陛下特發神斷擢任不疑蓋陛下深憂政教未舉賞
罰未明羣臣之邪正未分四方之利害未究故增耳目
之官以廣言路此陛下為社稷生靈大計也臣切思任
諫非難唯用諫之難如素靖修等忠誠剛氣著信於人
況蒙陛下獎拔之知必能箴闕失獻明謨適回邪擊權
倖思所以報効也然邪人惡之必有禦之之說不過曰

某人也好名也好進也彰君過也或進此說正是邪人
欲蔽天聰不可不察臣請為陛下陳之一曰好名夫忠
臣務盡其心事有必須切直者則極論之豈顧名哉若
避好名之毀而無所陳施則土木其人皆可備數何煩
陛下選揀如此之至況名者聖人以之勵世俗分善惡
豈可廢乎借使為善近名陛下試思今之人遠權利敦
潔行以近名者亦幾人哉二曰好進前古諫臣之難者
遭遇昏世上犯威嚴旁觸勢要鼎鑊居側斧鑕在前死

且不辭安得好進乎蓋近來諫官進用太速故世人得以謂之好進今諫官有盡忠補闕之効陛下但久而勿遷使其人果忠且義雖死於是官萬無恨矣三曰彰君過凡諫諍之臣蓋以司乎過舉也緩則密疏急則過言期於必正若人主從而行之適以彰乎從諫之美安得謂之彰過乎然諫官亦有好進彰君過者異於此巧者之為諫臣事之難言者則喑而不言擇其無所忤者言之就令不行不復再議退而曰某事我嘗言之矣此可

謂之好名也容容默默無所耻媿踐歷資序以登貴仕
此可謂之好進也凡人主有過諫官最為近密或不盡
言人主何從而知且變更乎傳之當世垂之於後終以
為過此可謂彰君過也臣向之所論乃忠臣巧者之分
願賜省覽今陛下出於聖慮自擢諫官必自主之若有
陳述於理適當即賜施行無使天下之人謂朝廷有好
諫之名而無好諫之實使其言有訐切亦願優假無為
姦邪讒間致有斥逐使天下之人指朝廷有拒諫之失

也臣迹遠言近不任兢惶激切之至

趙抃請留歐陽修等供職 伏以天子南面之尊左右
前後須得正人賢士為之羽翼朝廷有大賞罰可以詢
訪有大闕失可以裨益有大急難可以謀議有大禮法
可以質正竊見近日以來所謂正人賢士者紛紛引去
朝廷奈何自剪除羽翼臣未見其能致遠也憂國之人
莫不為之寒心如呂溱知徐州蔡襄知泉州吳奎被黜
知壽州韓絳知河陽府此皆衆所共惜其去又聞歐陽

脩乞知蔡州賈黯乞知荆南府侍從之賢如脩輩無幾
今堅欲請郡者非他蓋傑然正色立朝既不能曲奉權
要而乃日虞中傷皆欲扳溱襄奎絳而去耳今陛下又
從其請而外補之臣恐非朝廷之福朝廷萬一有緩急
事則陛下何從而詢訪也何從而裨益也何從而謀議
也何從而質正也所以失既多雖悔何及詩不云乎濟
濟多士文王以寧此謂文王雖大聖人得居尊而安寧
者蓋在朝多賢哲之士而致之然也臣愚伏望陛下鑑

古於今勿使脩等去職留為羽翼以自輔助則中外幸甚臣無任懇切納忠之至

司馬光諫院題名記 古者諫無官自公卿大夫至於

工商無不得諫者漢興以來始置官夫以天下之政四海之衆得失利病萃于一官使言之其為任亦重矣居是官者當志其大捨其細先其急後其緩專利國家而不為身謀彼汲汲於名者猶汲汲於利也其間相去何遠哉天禧初真宗詔置諫官六員責其職事慶厯中錢

君始書其名於版光恐久而漫滅嘉祐八年刻著於石
後之人將歷指其名而議之曰某也忠某也詐某也直
某也曲嗚呼可不懼哉

潘嗣興爭論 匹夫之賤猶立子以爭其惡立友以議
其過況萬乘之貴呼吸而霜露變指顧而榮辱移朝不
爭則暮有被其害暮不爭則朝亦然至有頃刻而不及
者孔子曰天子有爭臣七人雖無道不失其天下又曰
商有三仁焉比干諫而死其旨遠矣或豈無諫與諷歟

譬之疾耳有緩補逸養而後定有攻治而後勝有針砭而後起者蓋時有緩急勢有盈虛先後之理不可以一途御也諷者依違而不切詩所謂主文而譎諫此緩補逸養之道也諫者直指其事爭者嬰其鱗矣此攻治之不效而至於針砭也若堯咨而舜俞禹拜而益贊可以無事於諫爭猶曰予違汝弼汝無面從君臣相與戒飭兢業如此後世之君奚恤而不用哉昔者漢高帝謂周昌曰我何如主昌曰陛下桀紂之主也高帝容之決非

桀紂明矣如使桀紂之君雖無道猶用爭臣亦不失天下矣

原諫 舜命龍曰朕聖讒說殄行震驚朕師汝作納言夙夜出納朕命惟允於臯陶謨則曰能哲而惠何憂乎驩兜何畏乎巧言令色孔壬顏淵問為邦孔子曰遠佞人舜固聰明睿智君臣之間吁謨戒飭憂此而已顏淵亞聖亦云遠佞然則聖哲之慮遠矣諫之不行也其原起於近習始於纖微成於浸潤終至於不可禦人君者

喜則有賞怒則有誅不可不察也蓋未嘗濫誅矣誅一小臣則大臣及之未嘗濫賞矣賞一佞人則大臣及之不窒其源雖欲救之將若之何予故曰諫之不行其源蓋起於近習不可不慮也

諷諫 五十則

齊人王滿生見周公周公出見之曰先生遠辱何以教之王滿生曰言內事者於內言外事者於外今言內事乎言外事乎周公尊入王滿生曰敬從布席周公不導

坐王滿生曰言大事者坐言小事者倚今言大事乎言
小事乎周公尊坐王滿生坐周公曰先生何以教之王
滿生曰臣聞聖人不言而知非聖人者雖言不知今欲
言乎無言乎周公俛念有頃不對王滿生藉筆牘書之
曰社稷且危傳之於膺周公仰視見書曰唯唯謹聞命
矣明日誅管蔡

齊桓公出獵逐鹿而走入山谷之中見一老公而問之
曰是為何谷對曰為愚公之谷桓公曰何故對曰以臣

名之桓公曰今視公之儀狀非愚人也何為以公名對
曰臣請陳之臣故畜犝牛生子而大賣之而買駒少年
曰牛不能生馬遂持駒去傍隣聞之以臣為愚故名此
谷為愚公之谷桓公曰公誠愚矣夫何為而與之桓公
遂歸明日朝以告管仲管仲正衿再拜曰此夷吾之愚
也使堯在上咎繇為理安有取人之駒者乎若有見暴
如是叟者又必不與也公知獄訟之不正故與之耳請
退而脩政孔子曰弟子記之桓公霸君也管仲賢佐也

猶有以智為愚者也況不及桓公管仲者也

復橐之君朝齊桓公問治民焉復橐之君不對而循口操衿抑心桓公曰與民共甘苦饑寒乎夫以我為聖人也故不用言而諭因禮之千金

桓公飲酒醉遺其冠耻之三日不朝管仲曰此非有國之耻也公何故不雪之以政公曰善因發困倉賜貧窮論囹圄出薄罪處三日而民歌之曰公胡不復遺冠乎桓公放春三月觀於野桓公曰何物可比於君子之德

乎隰朋對曰夫粟內甲以處中有卷城外有兵刃未敢
自恃自命曰粟此其可比於君子之德乎管仲曰苗始
其少也朏朏乎其孺子也至其壯也莊莊乎其士
也至其成也由由乎茲免何其君子也天下得之則安
不得則危故命之曰禾此其可比於君子之德矣桓公
曰善

桓公觀於廐問廐吏曰廐何事最難廐吏未對管仲對
曰夷吾嘗為圉人矣傳馬棧最難先傳曲木曲木又求

曲木曲木已傳直木無所施矣先傳直木直木又求直木直求已傳曲木亦無所施矣

景公好弋使燭雛主鳥而亡之景公怒而欲殺之晏子曰燭雛有罪請數之以其罪乃殺之景公曰可於是乃召燭雛數之景公前曰汝為吾主鳥而亡之是一罪也使吾君以鳥之故殺人是二罪也使諸侯聞之以吾君重鳥而輕士是三罪也數燭雛罪已畢請殺之景公曰止勿殺而謝之

景公嘗賞賜及後宮文繡被臺榭菽粟食鳧雁出而見
殪謂晏子曰此何為死晏子對曰此餒而死公曰嘻寡
人之無德也何甚矣晏子對曰君之德著而彰何為無
德也景公曰何謂也對曰君之德及後宮與臺榭君之
玩物衣以文繡君之鳧雁食以菽粟君之營內自樂延
及後宮之族何為其無德也顧臣願有請於君由君之
意自樂之心推而與百姓同之則何殪之有不推此而
苟營內好私使財貨偏有所聚菽粟幣帛腐於囷府惠

不遍加於百姓公心不周乎國則桀紂之所以亡也夫士民之所以叛由偏之也君如察臣嬰之言推君之盛德公布之於天下則湯武可為也一矻何足恤哉

景公正晝被髮乘六馬御婦人以出正閨則跪擊其馬而反之曰爾非吾君也公慚而不朝晏子睹裔敖而問曰君何故不朝對曰昔者君正晝被髮乘六馬御婦人出正閨則跪擊其馬而反之曰爾非吾君也公慚而反不果出是以不朝晏子入見公曰昔者寡人有罪被髮

乘六馬以出正閨別跪擊其馬而反之曰爾非吾君也寡人以天子大夫之賜得率百姓以守宗廟今見戮於別跪以辱社稷吾猶可以齊於諸侯乎晏子對曰君無惡焉臣聞之下無直辭上無隱君民多諱言君有驕行古者明君在上下有直辭君上好善民無諱言今君有失行而別跪有直辭是君之福也故臣來慶請賞之以明君之好善禮之以明君之受諫公笑曰可乎晏子曰可於是令別跪倍資無正時朝無事

晏子歿十有七年景公飲諸大夫酒公射出質堂上唱善若出一口公作色太息播弓矢弦章入公曰章自吾失晏子於今十有七年未嘗聞吾過不善今射出質而唱善者若出一口弦章對曰此諸臣之不肖也知不足以知君之不善勇不足以犯君之顏色然而有一焉臣聞之君好之則臣服之君嗜之則臣食之夫尺蠖食黃則其身黃食蒼則其身蒼君其猶有諂人言乎公曰善今日之言章為君我為臣是時海人入魚公以五十乘

賜弦章歸魚乘塞塗撫其御之手曰曩之唱善者皆欲若魚者也昔者晏子辭賞以正君故過失不掩今諸臣諂諛以干利故出質而唱善如出一口今所輔于君未見於衆而受若魚是反晏子之義而順諂諛之欲也固辭魚不受君子曰弦章之廉乃晏子之遺行也

楚莊王欲伐陽夏師久而不罷羣臣欲諫而莫敢莊王獵于雲夢椒舉進諫曰王所以多得獸者馬也而王國亡王之馬豈可得哉莊王曰善不穀知誦強國之可以

長諸侯也知得地之可以富也而忘吾民之不用也明日飲諸大夫酒以椒舉為上客罷陽夏之師

昭王欲之荆臺游司馬子綦進諫曰荆臺之游左洞庭之陂右彭蠡之水南望獵山下臨方淮其樂使人遺老而忘死人君游者盡以亡其國願大王勿往游焉王曰荆臺乃吾地也有地而游之子何為絕吾游乎怒而擊之于是令尹子西駕安車四馬徑於殿下曰今日荆臺之游不可不觀也王登車而拊其背曰荆臺之游與子

共樂之矣步馬十里引轡而止曰臣不敢下車願得有
道大王肯聽之乎王曰第言之令尹子西曰臣聞之為
人臣而忠其君者爵祿不足以賞也為人臣而諛其君
者刑罰不足以誅也若司馬子綦者忠臣也若臣者諛
臣也願大王殺臣之軀罰臣之家而祿司馬子綦王曰
若能止聽公子獨能禁我游耳後世游之無有極時
柰何令尹子西曰欲禁後世易耳願大王山陵崩陔為
陵于荆臺未嘗有持鍾鼓管絃之樂而游于父之墓上

者也於是王還車卒不游荆臺令罷先置孔子從魯聞之曰美哉令尹子西諫之於十里之前而權之于百世之後者也

楚子狩于州來次于潁尾使蕩侯潘子司馬督囂尹午陵尹喜帥師圍徐以懼吳楚子次于乾谿以為之援雨雪王皮冠秦復陶翠被豹舄執鞭以出僕析父從右尹子革夕王見之去冠被舍鞭與之語曰昔我先王熊繹與呂伋王孫牟熒父禽父並事康王四國皆有分我獨

無有今吾使人於周求鼎以為分王其與我乎對曰與
君王哉昔我先王熊繹辟在荆山筭路藍縷以處草莽
跋涉山林以事天子唯是挑弧棘矢以共禦王事齊王
舅也晉及魯衛王母弟也楚是以無分而彼皆有今周
與四國服事君王將唯命是從豈其愛鼎王曰昔我皇
祖伯父昆吾舊許是宅今鄭人貪賴其田而不我與我
若求之其與我乎對曰與君王哉周不愛鼎鄭敢愛田
王曰昔諸侯遠我而畏晉今我大城陳蔡不羹賦皆千

乘子與有勞焉諸侯其畏我乎對曰畏君王哉是四國者專足畏也又加之以楚敢不畏君王哉工尹路請曰君王命剝圭以為鉞秘敢請命王入視之析父謂子革吾子楚國之望也子與王言如響國其若之何子革曰摩厲以須王出吾刃將斬矣王出復語左史倚相趨過王曰是良史也子善視之是能讀三墳五典八索九丘對曰臣嘗問焉昔穆王欲肆其心周行天下將皆必有車轍馬跡焉祭公謀父作祈招之詩以止王心王是以

獲沒於祗官臣問其詩而不知也若問遠焉其焉能知之王曰子能乎對曰能其詩曰祈招之愔愔式昭德音思我王度式如玉式如金形民之力而無醉飽之心王揖而入饋不食寢不寐數日不能自克以及於難仲尼曰古也有志克己復禮仁也信善哉楚靈王若能如是豈其辱於乾谿

晉平公好樂多其賦歛下治城郭曰敢有諫者死國人憂之有咎犯者見門大夫曰臣聞主君好樂故以樂見

門大夫入言曰晉人咎犯也欲以樂見平公曰內之上
坐殿上則出鐘磬竽瑟坐有頃平公曰客子為樂咎犯
對曰臣不能為樂臣善隱平公召隱士十二人咎犯曰
隱臣竊顧昧死御平公曰諾咎犯申其左臂而誦五指
平公問于隱官曰占之為何隱官皆曰不知平公曰歸
之咎犯則申其一指曰是一也便遊赭盡而峻城闕二
也柱梁衣繡士民無褐三也侏儒有餘酒而死士渴四
也民有饑色而馬有粟秩五也近臣不敢諫遠臣不敢

達平公曰善乃屏鐘鼓除竽瑟遂與咎犯參治國

晉荀盈如齊逆女還六月卒於戲陽殯於絳未葬晉侯
飲酒樂膳宰屠蒯趨入請佐公使尊許之而遂酌以飲
工曰女為君耳將司聰也辰在子卯謂之疾日君徹宴
樂學人舍業為疾故也君之卿佐是謂股肱股肱或虧
何痛如之女弗聞而樂是不聰也又飲外嬖嬖叔曰女
為君目將司明也服以旌禮禮以行事事有其物物有
其容今君之容非其物也而女不見是不明也亦自飲

也曰味以行氣氣以實志志以定言言以出令臣實司
味二御失官而君弗命臣之罪也公說徹酒初公欲廢
知氏而立其外嬖為是悛而止秋八月使荀躒佐下軍
以說焉

平公射鵠不死使豎襄搏之失公怒拘將殺之叔向聞
之夕君告之叔向曰君必殺之昔吾先君唐叔射兕于
徒林殪以為大甲以封于晉今君嗣吾先君唐叔射鵠
不死搏之不得是揚吾君之耻者也君其必速殺之勿

令遠聞君忸怩顏乃趣赦之

平公使叔向聘于吳吳人拭舟以逆之左五百人右五百人有繡衣而豹裘者有錦衣而狐裘者叔向歸以告平公平公曰吳其亡乎奚以敬舟奚以敬民叔向對曰君為馳底之臺上可以發千兵下可以陳鐘鼓諸侯聞君者亦曰奚以敬臺奚以敬民所敬各異也於是平公乃罷臺

魯哀公問孔子曰子聞忘之甚者徙而忘其妻有諸乎

孔子對曰此非忘之甚者也忘之甚者忘其身哀公曰
可得聞歟對曰昔夏桀貴為天子富有天下不脩禹之
道毀壞辟法裂絕世祀荒淫于樂沉酗于酒其臣有左
師觸龍者諂諛不止湯誅桀左師觸龍者身死四支不
同壇而居此忘其身者也哀公愀然變色曰善

鄭尉氏司氏之亂其餘盜在宋鄭人以子西伯有子產
之故納賂于宋以馬四十乘與師茂師慧三月公孫黑
為質焉司城子罕以堵女父尉翩司齊與之良司臣而

逸之託諸季武子武子寘諸卞鄭人醢之三人也師慧
過宋朝將私焉其相曰朝也慧曰無人焉相曰朝也何
故無人慧曰必無人焉若猶有人豈其以千乘之相易淫
樂之矇必無人焉故也子罕聞之固請而歸之

吳王欲伐荆告其左右曰敢有諫者死舍人有少孺子
者欲諫不敢則懷丸操彈遊於後園露沾其衣如是者
三且吳王曰子來何苦沾衣如此對曰園中有樹其上
有蟬蟬高居悲鳴飲露不知螳螂在其後也螳螂委身

曲附欲取蟬而不知黃雀在其傍也黃雀延頸欲啄螳螂而不知彈丸在其下也此三者皆務欲得其前利而不顧其後之有患也吳王曰善哉乃罷其兵

吳王欲從民飲酒伍子胥諫曰不可昔白龍下清冷之淵化為魚漁者豫且射中其目白龍上訴天帝天帝曰當是之時若安置而形白龍對曰我下清冷之淵化為魚天帝曰魚固人之所射也若是豫且何罪夫白龍天帝貴畜也豫且宋國賤臣也白龍不化豫且不射今棄

萬乘之位而從布衣之士飲酒臣恐其有豫且之患矣
王乃止

趙簡子田于嬖史黥聞之以犬待於門簡子見之曰何
為曰有所得犬欲試之茲圍簡子曰何為不告對曰君
行臣不從不順主將適嬖而麓不聞臣敢煩當日簡子
乃還

薄疑謂趙簡主曰君之國中飽簡主欣然而喜曰何如
焉對曰府庫空虛於上百姓貧餓於下然而姦吏富矣

魏文侯見箕季其墻壞而不築文侯曰何為不築對曰
不時其墻枉而不端問曰何不端曰固然從者食其園
之桃箕季禁之少焉日晏進糲餐之食瓜瓠之羹文侯
出其僕曰君亦無得於箕季矣曩者進食臣竊窺之糲
餐之食瓜瓠之羹文侯曰吾何無得於季也吾一見季
而得四焉其墻壞不築云待時者教我無奪農時也墻
枉而不端對曰固然是教我無侵封疆也從者食園
桃箕季禁之豈愛桃哉是教我下無侵上也食我以糲

餐者季豈不能具五味哉教我無多歛於百姓以省飲食之養也

客謂梁王曰惠子之言事也善譬王使無譬則不能言矣王曰諾明日見謂惠子曰願先生言事則直言耳無譬也惠子曰今有人于此而不知彈者曰彈之狀何若應曰彈之狀如彈則諭乎王曰未諭也於是更應曰彈之狀如弓而以竹為弦則知乎王曰可知矣惠子曰夫說者固以其所知諭其所不知而使人知之今王曰無

譬則不可矣王曰善

韓王謂樓緩曰三國之兵深矣寡人欲割河東而講何如對曰夫割河東大費也免國於患大功也此父兄之任也王何不召公子汜而問焉王召公子汜而告之對曰講亦悔不講亦悔王今割河東而講三國歸王必曰三國固且去矣吾特以三城送之不講三國也入韓則國必大舉矣王必大悔曰不獻三城也臣故曰王講亦悔不講亦悔王曰為我悔也寧亡三城而無悔危乃悔

寡人斷講矣

靖郭君將城薛客多以諫靖郭君謂謁者無為客通齊
人有請者曰臣請三言而已矣蓋一言臣請烹靖郭君
因見之客趨而進曰海大魚因反走君曰客有於此客
曰鄙臣不敢以死為戲君曰亡更言之對曰君不聞大
魚乎網不能止鈎不能牽蕩而失水則螻蟻得意焉今
夫齊亦君之水也君長齊奚以薛為無齊雖隆薛之城
到於天猶之無益也君曰善乃輟城薛

孟嘗君將入秦止者千數而弗聽蘇代欲止之孟嘗君
曰人事者吾已盡知之矣吾所未聞者獨鬼事耳蘇代
曰臣之來也固不敢言人事也固且以鬼事見君孟嘗
君見之謂孟嘗君曰今臣來過於淄上有土偶人與桃
梗相與語桃梗謂土偶人曰子西岸之土也挺土以為
人至歲八月降雨下淄水至則汝殘矣土偶曰不然吾
西岸之土也土則復西岸耳今子東國之桃梗也刻削
子以為人降雨下淄水至流子而去則子漂漂者將如

何耳今秦四塞之國譬如虎口而君入之則臣不知君所出矣孟嘗君乃止

建信君貴於趙公子魏牟過趙趙王迎之顧反至坐前有尺帛且令工人以為冠工見客來也因避趙王曰公子乃驅後車幸以臨寡人願聞所以為天下魏牟曰王能重王之國若此尺帛則王之國大治矣趙王不說形於顏色曰先王不知寡人不肖使奉社稷豈敢輕國若此魏牟曰王無怒請為王說之曰王有此尺帛何不令前

郎中以為冠王曰郎中不知為冠魏牟曰為冠而敗之
奚虧於王國而王必待工而後乃使之今為天下之工
或非也社稷為虛戾先王不血食而王不以予工乃與
幼艾且王之先帝駕犀首而驂馬服以與秦角逐秦當
時避其鋒今王憧憧乃輦建信以與強秦角逐臣恐秦
折王之觜也

趙太后新用事秦急攻之趙氏求救於齊齊曰必以長
安君為質兵乃出太后不肯大臣強諫太后明謂左右

有復言令長安君為質者老婦必唾其面右師觸警願見太后盛氣而揖之入而徐趨至而自謝曰老臣病足曾不能疾走不得見久矣竊自恕恐太后玉體之有所却也故願望見太后曰老婦恃輦而行曰日食飲得無衰乎曰恃鬻耳曰老臣今者殊不欲食乃自強步日三四里少益嗜食和於身曰老婦不能太后之色少解左師公曰老臣賤息舒祺最少不肖而臣衰竊愛憐之願令補黑衣之數以衛王宮没死以聞太后曰敬諾年幾

何矣對曰十五歲矣雖少願及未填溝壑而託之太后
曰丈夫亦愛憐其少子乎對曰甚於婦人太后曰婦人
異甚對曰老臣竊以為媼之愛燕后賢於長安君曰君
過矣不若長安君之甚左師公曰父母之愛子則為之
計深遠媼之送燕后也持其踵為之泣念悲其遠也亦
哀之矣已行非弗思也祭祀必祝之祝曰必勿使反豈
非計久長有子孫相繼為王也哉太后曰然左師公曰
今三世以前至於趙之為趙趙王之子孫侯者其繼有

在者乎曰無有曰微獨趙諸侯有在者乎曰老婦不聞也此其近者禍及身遠者及其子孫豈人主之子孫則必不義哉位尊而無功奉厚而無勞而挾重器多也今媼尊長安君之位而封以膏腴之地多子之重器而不及今令有功於國一旦山陵崩長安君何以自託於趙老臣以媼為長安君計短也故以為其愛不若燕后太后曰諾恣君之所使之於是為長安君給車百乘質於齊齊兵乃出子義聞之曰人主之子也骨肉之親也猶

不能恃無功之尊無勞之奉以守金玉之重也而況人
臣乎

秦敗魏於華魏王且入朝於秦周訴謂王曰宋人有學
者三年反而名其母其母曰子學三年反而名我者何
也其子曰吾所賢者無過堯舜堯舜名吾所大者無大
天地天地名今母賢不過堯舜母大不過天地是以
名母也其母曰子之於學者將盡行之乎願子之有以
易名母也子之於學也將有所不行也願子之且以名

母為後也今王之事秦尚有可以易入朝者乎願王之
有以易之而以入朝為後魏王曰子患寡人入而不出
邪許綰為我祝曰入而不出請殉寡人以頭周訢對曰
如臣之賤也今人有謂臣曰入不測之淵而必出不出
請以一鼠首為汝殉者臣必不為也今秦不可知之國
也猶不測之淵也而許綰之首猶鼠首也內王於不可
知之秦而殉王以鼠首臣竊為王不取也且無梁孰與
無河內急王曰梁急無梁孰與無身急王曰身急以三

者身上也河內其下也秦未索其下而王効其上可乎
王尚未聽也支期曰王視楚王楚王入秦王以三乘先
之楚王不入楚魏為一尚足以捍秦王乃止王謂支期
曰吾始也諾於應侯矣今不行者欺之矣支期曰王勿
憂也臣使長信侯請無內王王待臣也支期說於長信
侯曰王命召相國長信侯曰王何以臣為支期曰臣不
知也王急召君長信侯曰吾內王於秦者寧以為秦邪
吾以為魏也支期曰君無為魏計君其自為計且安死

乎安生乎安窮乎安貴乎君其先自為計後為魏計長
信侯曰樓公將入矣臣今從支期曰王急召君君不行
血濺君襟矣長信侯行支期隨其後且見王支期先入
謂王曰偽病者乎而見之臣已恐之矣長信君入見王
王曰病甚奈何吾始已諾於應侯矣意雖道死行乎長
信侯曰王毋行矣臣能得於應侯矣願王無憂 華軍
之戰魏不勝秦明年將使段干崇割地而講孫臣謂魏
王曰魏不以敗之上割可謂善用不勝矣而秦不以勝

之上割可謂不善用勝矣今處期年乃欲割是羣臣之私而王不知也且夫欲璽者段干子也王因使之割地欲地者秦也而王因使之授璽夫欲璽者制地而欲地者制璽其勢必無魏矣且夫奸人固皆欲以地事秦以地事秦譬猶抱薪而救火也薪不盡則火不止今王之地有盡而秦求之無窮是薪火之說也魏王曰善雖然吾以許秦矣不可以革也對曰王獨不見夫博者之用梟耶欲食則食欲握則握今君劫於羣臣而許秦因曰不

可革何用智之不若臬也魏王曰善乃按其行

呂覽開春篇 開春始雷則蟄蟲動矣時雨降則草木

育矣飲食居處適則九竅百節千脉皆通利矣王者厚

其德積衆善而鳳凰聖人皆來至矣共伯和脩其行好

賢仁而海內皆以來為稽矣周厲之難天子曠絕而天

下皆來謂矣以此言物之相應也故曰行也成也善說

者亦然言盡理而得失利害定矣豈為一人言哉魏惠

王死葬有日矣天大雨雪至於牛目羣臣多諫於太子

者曰雪甚如此而行葬民必甚疾之官費又恐不給請
弛期更日太子曰為人子者以民勞與官費用之故而
不行先王之葬不義也子勿復言羣臣皆莫敢諫而以
告犀首犀首曰吾未有以言之是其唯惠公乎請告惠
公惠公曰諾駕而見太子曰葬有日矣太子曰然惠公
曰昔王季歷葬於渦山之尾藥水齧其墓見棺之前和
文王曰謔先君必欲一見羣臣百姓也天故使藥水見
之於是出而為之張朝百姓皆見之三日而後更葬此

文王之義也今葬有日矣而雪甚及牛目難以行太子為及日之故得無嫌於欲亟葬乎願太子易日先王必欲少留而撫社稷安黔首也故使雨雪甚因弛期而更為日此文王之義也若此而不為意者羞法文王也太子曰甚善敬弛期更擇葬日惠子不徒行說也又令魏太子未葬其先君而因有說文王之義說文王之義以示天下豈小功也哉韓氏城新城期十五日而成段喬為司空有一縣後二日段喬執其吏而囚之囚者之子走

告封人子高曰唯先生能活臣父之死願委之先生封人子高曰諾乃見段喬自扶而上城封人子高左右望曰美哉城乎一大功矣子必有厚賞矣自古及今功若此其大也而能無有罪戮者未嘗有也封人子高出段喬使人夜解其吏之束縛也而出之故曰封人子高為之言也而匿已之為而為也段喬聽而行之也匿已之行之也說之行若此其精也封人子高可謂善說矣叔向之弟羊舌虎善藥盈藥盈有罪於晉晉誅羊舌

虎叔嚮為之奴而股祈奚曰吾聞小人得位不爭不祥
君子在憂不救不祥乃往見范宣子而說也曰聞善為
國者賞不過而刑不慢賞過則懼及淫人刑慢則懼及
君子與其不幸而過寧過而賞淫人毋過而刑君子故
堯之刑也殛鯀於虞而用禹周之刑也戮管蔡而相周
公不慢刑也宣子乃命吏出叔嚮救人之患者行危若
不避煩辱猶不能免今祈奚論先王之德而叔嚮得免
焉學豈可以已哉類多若此

齊宣王為太室大益百畝堂上三百戶以齊之大具之
三年而未能成羣臣莫敢諫王春居問於宣王曰荆王
釋先王之禮樂而樂為輕敢問荆國為有主乎王曰為
無主賢臣以千數而莫敢諫敢問荆國為有臣乎王曰
為無臣今王為太室其大益百畝堂上三百戶以齊國
之大具之三年而弗能成羣臣莫敢諫敢問王為有臣
乎王曰為無春居曰臣請辟矣趨而出王曰春子春子
反何諫寡人之晚也寡人請今止之遽召掌書曰書之

寡人不肖而好為大室春子止寡人箴諫不可不熟莫
敢諫若非弗欲也春居之所以欲之與人同其所以入之
與人異宣王微春居幾為天下笑矣由是論之失國之
主多如宣王然患在乎無春居

魏王問張旄曰吾欲與秦攻韓何如張旄對曰韓日生
而胥亡乎且割而從天下乎王曰韓且割而從天下張
旄曰韓怨魏乎怨秦乎王曰怨魏張旄曰韓強秦乎強
魏乎王曰強秦張旄曰韓且割而從其所強與所不怨

乎且割而從其所不强與其所怨乎王曰韓將割而從其所强與其所不怨張旄曰攻韓之事王自知矣

漢司馬遷滑稽列傳 孔子曰六藝於治一也禮以節

人樂以發和書以道事詩以達意易以神化春秋以道義太史公曰天道恢恢豈不大哉談言微中亦可以解

紛

淳于髡者齊之贅壻也長不滿七尺滑稽多辯數使諸侯未嘗屈辱齊威王之時喜隱好為淫樂長夜之飲沉

酒不治委政卿大夫百官荒亂諸侯並侵國且危亡在
於且暮左右莫敢諫淳于髡說之以隱曰國中有大鳥
止王之庭三年不蜚又不鳴王知此鳥何也王曰此鳥
不飛則已一飛冲天不鳴則已一鳴驚人於是乃朝諸
縣令長七十二人賞一人誅一人奮兵而出諸侯振驚
皆還齊侵地威行三十六年語在田完世家中威王八
年楚大發兵加齊齊王使淳于髡之趙請救兵齎金百
斤車馬十駟淳于髡仰天大笑冠纓索絕王曰先生少

之乎髡曰何敢王曰笑豈有說乎髡曰今者臣從東方
來見道傍有穰田者操一豚蹄酒一盃而祝曰甌窶滿
篝汙邪滿車五穀蕃熟穰穰滿家臣見其所持者狹而
所欲者奢故笑之於是齊威王乃益齋黃金十鎰白璧
十雙車馬百駟髡辭而行至趙趙王與之精兵十萬革
車千乘楚聞之夜引兵而去威王大說置酒後官召髡
賜之酒問曰先生能飲幾何而醉對曰臣飲一斗亦醉
一石亦醉威王曰先生飲一斗而醉惡能飲一石哉其

說可得聞乎髡曰賜酒大王之前執法在傍御史在後
髡恐懼俯伏而飲不過一斗徑醉矣若親有嚴客髡奉
鞞鞠脰侍酒於前時賜餘瀝奉觴上壽數起飲不過二
斗徑醉矣若朋友交遊久不相見卒然相覩歡然道故
私情相語飲可五六斗徑醉矣若乃州閭之會男女雜
坐行酒稽留六博投壺相引為曹握手無罰目眇不禁
前有墮珥後有遺簪髡竊樂此飲可八斗而醉二參日
暮酒闌合尊促坐男女同席履舄交錯杯盤狼藉堂上

燭滅主人留髡而送客羅襦襟解微聞薌澤當此之時
髡心最歡能飲一石故曰酒極則亂樂極則悲萬事盡
然言不可極極之而衰以諷諫焉齊王曰善乃罷長夜
之飲以髡為諸侯主客宗室置酒髡嘗在側

優孟者故楚之樂人也長八尺多辯常以談笑諷諫楚
莊王之時有所愛馬衣以文繡置之華屋之下席以露
牀啗以棗脯馬病肥死使羣臣喪之欲以棺槨大夫禮
葬之左右爭之以為不可王下令曰有敢以馬諫者罪

至死優孟聞之入殿門仰天大哭王驚而問其故優孟
曰馬者王之所愛也以楚國堂堂之大何求不得而以
大夫禮葬之薄請以人君禮葬之王曰何如對曰臣請
以雕玉為棺文梓為椁梗楓豫章為題湊發甲卒為穿
壙老弱負土齊趙陪位於前韓魏翼衛其後廟食太牢
奉以萬戶之邑諸侯聞之皆知大王賤人而貴馬也王
曰寡人之過一至此乎為之柰何優孟曰請為大王六
畜葬之以壙竈為椁銅歷為棺齋以黃棗薦以木蘭祭

以糧稻衣以火光葬之於人腹腸於是王乃使以馬屬太
官無令天下久聞也楚相孫叔敖知其賢人也善待之
病且死屬其子曰我死汝必貧困若往見優孟言我孫
叔敖之子也居數年其子窮困負薪逢優孟與言曰我
孫叔敖之子也父且死時屬我貧困往見優孟優孟曰
若無遠有所之即為孫叔敖衣冠抵掌談語歲餘像孫
叔敖楚王左右不能別也莊王置酒優孟前為壽莊王
大驚以為孫叔敖復生也欲以為相優孟曰請歸與婦

計之三日而為相莊王許之三日後優孟復來王曰婦
言謂何孟曰婦言慎無為楚相不足為也如孫叔敖之
為楚相盡忠為廉以治楚楚王得以霸今死其子無立
錐之地貧困負薪以自飲食必如孫叔敖不如自殺因
歌曰山居耕田苦難以得食起而為吏身貪鄙者餘財
不顧耻辱身死家室富又恐受賕枉法為奸觸大罪身
死而家滅貪吏安可為也念為廉吏奉法守職竟死不
敢為非廉吏安可為也楚相孫叔敖持廉至死方今妻

子窮困負薪而食不足為也於是莊王謝優孟乃召孫叔敖子封之寢邱四百戶以奉其祀後十世不絕此知可以言時矣

優旃者秦倡侏儒也善為笑言然合於大道秦始皇時置酒而天雨陛楯者皆沾寒優旃見而哀之謂之曰汝欲休乎陛楯者皆曰幸甚優旃曰我即呼汝汝疾應曰諾君有頃殿上上壽呼萬歲優旃臨檻大呼曰陛楯郎郎曰諾優旃曰汝雖長何益幸雨立我雖短也幸休居

於是始皇使陞楯者得半相代始皇嘗議欲大苑園東
至函谷關西至雍陳倉優旃曰善多縱禽獸於其中寇
從東方來令麋鹿觸之足矣始皇以故輟止二世立又
欲漆其城優旃曰善主上雖無言臣固將請之漆城雖
於百姓愁費然佳哉漆城蕩蕩寇來不能上即欲就之
易為漆耳顧難為蔭室於是二世笑之以其故止居無
何二世殺死優旃歸漢數年而卒太史公曰淳于髡
仰天大笑齊威王橫行優孟搖頭而歌負薪者以封優

旃臨檻疾呼陛楯得以半更豈不亦偉哉

公孫詭羊勝說孝王求為景帝太子及益地事恐漢大臣不聽乃因使人刺漢用事謀臣及殺故吳相袁盎景帝遂聞詭勝等計畫乃遣使捕詭勝必得漢使十輩至梁相以下舉國大索月餘不得內史安國聞詭勝匿孝王所安國入見王而泣曰主辱臣死大王無良臣故事紛紛至此今詭勝不得請辭賜死王曰何至此安國泣數行下曰大王自度于皇帝孰與太上皇之與高皇帝

及皇帝之與臨江王親孝王曰弗如也安國曰夫太上臨江親父子之間然而高帝曰提三尺劍取天下者朕也故太上皇終不得制事居于櫟陽臨江王適長太子也以一言過廢王臨江用宮垣事卒自殺中尉府何者治天下終不以私亂公語曰雖有親父安知其不為虎雖有親兄安知其不為狼今大王列在諸侯悅一邪臣浮說犯上禁撓明法天子以太后故不忍致法于王太后日夜涕泣幸大王自改而大王終不覺寤有如太后

宮車即晏駕大王尚誰攀乎語未卒孝王泣數行下謝
安國曰吾今出說勝說勝自殺漢使還報梁事皆得釋
安國之力也於是景帝太后益重安國

魯相初到民自言相訟王取其財物百餘人田叔取其
渠率二十人各笞五十餘各搏二十怒之曰王非若主
邪何自敢言若主魯王聞之大慙發中府錢使相償之
相曰王自奪之使相償之是王為惡而相為善也相毋
與償之於是王乃盡償之魯王好獵相常從入苑中王

輒休相就館舍相出常暴出待王苑外王數使人請相
休終不休曰我王暴露苑中我獨何為就舍魯王以故
不大出游

王式字翁思東平新桃人也事免中徐公及許生式為
昌邑王師昭帝崩昌邑王嗣立以行淫亂廢昌邑羣臣
皆下獄誅唯中尉王吉郎中令龔遂以數諫減死論式
繫獄當死治事使者責問曰師何以亡諫書式對曰臣
以詩三百五篇朝夕授王至於忠臣孝子之篇未嘗不

為王反復誦之也至於危亡失道之君未嘗不流涕為
王深陳之也臣以三百五篇諫是以亡諫書使者以聞
亦得減死論

彭脩仕為郡功曹時西部都尉宰蠹行太守事以微過
收吳縣獄吏將殺之主簿鍾離意爭諫甚切蠹怒使收
縛意欲案之掾吏莫敢案脩排闥直入拜於庭曰明府
發雷霆於主簿請聞其過蠹曰受教三日初不奉行廢
命不忠豈非過邪脩因拜曰昔任座面折文侯朱雲攀

殿欄檻自非賢君焉得忠臣今慶明府為賢君主簿為忠臣鼂遂原意罰貫獄吏罪

龐參為漢陽太守郡人任棠者有奇節隱居教授參到候之棠不與言但以薤一大本水一盃置戶屏前自抱兒孫伏於戶下主簿白以為倨參思其微意良久曰棠是欲曉太守也水者欲吾清也拔大本薤者欲吾擊強宗也抱兒當戶欲吾恤孤也於是嘆息而還參在職果能抑強助弱以惠政得民

北漢大昌文獻公劉殷卒殷為相不犯顏忤旨然因事
進規補益甚多漢主聰每與羣臣議政事殷無所是非
羣臣出殷獨留為聰敷暢條理商榷事宜聰未嘗不從
之殷常戒子孫曰事君當務幾諫凡人尚不可面斥其
過況萬乘乎夫幾諫之功無異犯顏但不彰君之過所
以為優耳官至侍中太保錄尚書賜劍履上殿入朝不
趨乘輿入殿然殷在公卿間恂恂有卑讓之色故能
處驕暴之國保其富貴不失令名以壽考自終

唐以蘇世長為諫議大夫嘗從校獵高陵大獲禽獸高祖顧羣臣曰今日畋樂乎世長對曰陛下遊獵薄廢萬幾不滿十旬未足為樂高祖變色既而笑曰狂態復發邪對曰於臣則狂於陛下甚忠嘗侍宴披香殿酒酣謂高祖曰此殿煬帝之所為邪高祖曰卿諫似直而實多詐豈不知此殿朕所為而謂之煬帝乎對曰臣實不知但見其華侈如傾宮鹿臺非興王之所為故也若陛下為之誠非所宜臣昔侍陛下於武功見所居宅僅庇風

雨當時亦以為足今因隋之宮室已極侈矣而又增之將何以矯其失乎高祖深然之

太宗謂太子少師蕭瑀曰朕少時好弓矢得良弓十數自謂無以加近以示弓工乃曰皆非良材朕問其故工曰木心不直則脉理皆邪弓雖勁而發矢不直朕始寤鄉者辨之未精也朕以弓矢定四方識之猶未能盡況天下之務其能徧知乎乃命京官五品以上更宿中書內省數延見問以民間疾苦及政事得失

中宗數與近臣學士宴集令各效伎藝以為樂工部尚書張錫舞談容娘將作大匠宗晉卿舞渾脫左衛將軍張洽舞黃麋左金吾將軍杜元談誦婆羅門呪中書舍人盧藏用效道士上章國子司業河東郭山惲獨曰臣無所解請歌古詩中宗許之山惲乃歌鹿鳴蟋蟀明日中宗賜山惲救嘉美其意賜時服一襲中宗又嘗宴侍臣使各為迴波辭衆皆為諂語或自求榮祿諫議大夫李景伯曰迴波爾時酒卮微臣職在箴規侍宴既過三

爵誼諱竊恐非儀中宗不悅蕭至忠曰此真諫官也


穆宗見夏州觀察判官柳公權書跡愛之以公權為右
拾遺翰林侍書學士穆宗問公權卿書何能如是之善
對曰用筆在心心正則筆正穆宗默然改容知其以筆
諫也

明皇時千秋節羣臣皆獻寶鏡張九齡以為以鏡自照
見形容以人自照見吉凶乃述前世興廢之原為書五
卷謂之千秋金鏡錄上之賜書褒美

武承嗣三思營求為太子狄仁傑從容言於太后曰太宗擲風沐雨親冒鋒鏑以定天下傳之子孫大帝以二子託陛下陛下今乃欲私之他族無乃非天意乎且姑姪之與母子孰親陛下立子則千秋萬歲後配食太廟立姪則未聞姪為天子而祔姑於廟者也太后曰此朕家事卿勿預知仁傑曰王者以四海為家四海之內何者不為陛下家事況元首股肱義同一體臣備位宰相豈得有所不預知乎因勸太后召還廬陵王太后意稍

寤他日又謂仁傑曰朕夢大鸚鵡兩翼皆折何也對曰武者陛下姓兩翼者二子也陛下起二子則兩翼振矣太后由是無立承嗣三思之意

李德裕獻丹宸六箴一曰宵衣以諷視朝稀晚二曰正服以諷服御乖異三曰罷獻以諷徵求玩好四曰納誨以諷悔棄讜言五曰辨邪以諷信任羣小六曰防微以諷輕出遊幸



經濟類編卷二十六